



TOSHKENT DAVLAT YURIDIK UNIVERSITETI REKTORINING BUYRUG‘I

04.04.2024

221-tm-son

Talabaga hayfsan e‘lon qilish to‘g‘risida

Bugungi kunda universitetda yuksak talablar va zamonaviy xalqaro standartlarga javob beradigan yuqori malakali yuridik kadrlarni tayyorlash maqsadida talabalarni ma‘naviy-axloqiy tarbiyalash, huquqiy madaniyati va ongini oshirish bo‘yicha samarali tizimni yaratish, ularda yuksak ma‘naviy-axloqiy fazilatlarni shakllantirish hamda rivojlantirish maqsadida bir qator kompleks chora-tadbirlar amalga oshirilmoqda.

Shunga qaramasdan, ayrim talabalar tomonidan universitet Odob-axloq kodeksi va boshqa ichki tartib qoidalarini buzish holatlari kuzatilmoqda.

Xususan, Xalqaro huquq va qiyosiy huquqshunoslik fakulteti 1-kurs talabasi Tursunboyev Elmurod Erkin o‘g‘li universitetda o‘qiyotgan bir nechta talabalardan o‘zining plastik kartasiga pul o‘tkazib berishsa, naqd pul qilib qaytarib berishini aytib, ularning pullarini olgan, ammo mazkur pullarni qaytarib bermagan.

E.Tursunboyev quyidagi talabalardan, xususan G‘.Naqibboyevdan 100 ming so‘m, L.Doniyorovdan 350 ming so‘m, S.Yuldashevdan 65 ming so‘m, D.Safarovdan 50 ming so‘m, J.Nabiyevdan 200 ming so‘m, J.Bobomurodovdan 65 ming so‘m, M.Mo‘minovdan 100 ming, N.Muxtorovdan 100 ming so‘m va A.Yusupovdan 200 ming so‘m miqdoridagi pullarni olib, har xil bahonalar bilan o‘z vaqtida qaytarmaganligi uchun universitet rektorining 2024-yil 20-fevraldagi 99-tm-son buyrug‘i bilan hayfsan intizomiy jazosi qo‘llanilgan.

Mazkur holatga yangi ochilgan holat sifatida E.Tursunboyev yana boshqa talabalarining pullarini olganligi aniqlandi. Xususan, E.Tursunboyev 2024- yil 28-yanvar kuni talaba Z.Eshquvvatovdan o‘zining plastik kartasiga 50 ming so‘m o‘tkazdirib olib qaytarib bermagan. Shuningdek, E.Tursunboyev 2024-yil 19-fevral kuni talaba Sh.Bo‘riboyevdan 150 ming so‘m plastik kartasidan bersa naqd berishni va‘da qilib, olgan pulini qaytarmagan. Talaba Sh.Bo‘riboyevdan olgan pulni E.Tursunboyevning amakisi M.Mahamatov tomonidan qaytarib berilgan.

Talaba E.Tursunboyev o‘z tushuntirish xatida talaba Z.Eshquvvatovdan 50 ming so‘m va talaba Sh.Bo‘riboyevdan 150 ming so‘m pullarini olganligini, Sh.Bo‘riboyevga 150 ming so‘m pulini qaytarganini, ammo Z.Eshquvvatovga 50 ming so‘m pulini hozirgi kunga qadar qaytarib bermaganini qayd etgan.

Talaba E.Tursunboyevning mazkur harakatlari uchun universitet rektorining 2024-yil 20-fevraldagi 99-tm-son buyrug‘i bilan hayfsan intizomiy chorasi qo‘llanilgan bo‘lib, talaba E.Tursunboyev mazkur buyruq bilan 2024-yil 20-fevralda tanishtirilgan, 2024-yil 14-fevral va 2024-yil 22-fevralda talaba E.Tursunboyev, uning otasi E.Maxamatov va onasi M.Maxamatovalarning

ishtirokida dalolatnoma tuzilib, talaba E.Tursunboyev harakatlari bo'yicha tushuntirish ishlari olib borilib, takroran sodir etilganda talabalar safidan chetlashtirilishi to'g'risida ogohlantirilishiga qaramasdan talaba E.Tursunboyev 2024-yil 23-fevral kuni talaba A.Samatovdan plastik kartasiga o'tkazib berishini aytib, uning naqd 50 ming so'm pulini olgan hamda mazkur pullarni qaytarib bermagan.

Talaba E.Tursunboyev o'z tushuntirish xatida 2024-yil 23-fevral kuni talaba A.Samatovdan naqd 50 ming so'm pulini olganligini qayd etgan.

Jabrlanuvchi talaba A.Samatov o'z arizasida 2024-yil 23-fevral kuni talaba E.Tursunboyev o'zini Manguberdi deb tanishtirgani, Jinoiy-huquqiy fakultetda o'qishini aytib, plastik kartasiga tashlab berishini aytib, undan naqd 50 ming so'm pulini olgani, bog'lanish uchun 94-127-60-43 sonli telefon raqamini bergani, mazkur nomerga telefon qilganda mazkur raqam mavjud emasligini bilgani hamda mazkur talabani aniqlashtirish uchun universitet qo'riqlash xizmati xodimlariga murojaat qilganini qayd etgan.

Bundan tashqari, talaba E.Tursunboyev o'ziga tegishli xulosa chiqarmasdan 2024-yil 27-mart kuni Jinoiy odil sudlov fakulteti 2-kurs talabasi Z.Mardonovdan naqd 100 ming so'm pul bersa universitetga kirib akasidan 3 daqiqada plastik kartasiga tashlab berishini, Xalqaro huquq va qiyosiy huquqshunoslik fakulteti 2-kursda o'qishini, plastik kartasiga tashlab berishni va'da qilib 100 ming so'm pulni naqd olib qaytarib bermagan. Shuningdek, talaba E.Tursunboyev bergan telegramiga talaba Z.Mardonov "salom pul tashamadizmi" deb yozishi bilan uni bloklab qo'ygan.

Talaba E.Tursunboyev o'z tushuntirish xatida 2024-yil 27-mart kuni talaba Z.Mardonovdan naqd 100 ming so'm pul olib 3 daqiqada qaytarishini aytib bermaganligini qayd etgan.

Talaba E.Tursunboyev mazkur takroran harakati bilan universitet Odob-axloq kodeksi 17-moddasining 1-qismi birinchi xatboshisi (har qanday huquqbuzarlik yoki jinoyat sodir etish), beshinchi xatboshisi (xodim, talaba va doktorantlarga jismoniy, ma'naviy yoki moddiy zarar yetkazish) va oltinchi xatboshisi (xodim, talaba, doktorant yoki boshqa shaxslarning mulkiga, moddiy qimmatliklariga egalik qilish, foydalanish yoki tasarruf etish uchun turli ko'rinishda egallab olish, basharti ushbu holat tegishli asoslar bilan o'z tasdig'ini topsa) talablarini buzgan.

Yuqoridagilarni inobatga olgan holda Oliy ta'lim to'g'risidagi nizom (ro'yxat raqami 1222, 2003-yil 22-fevral) 51-bandi, Toshkent davlat yuridik universiteti Odob-axloq kodeksining 17-moddasining 1-qismi birinchi, beshinchi va oltinchi xatboshisi hamda universitetning Ichki tartib qoidalari (ichki mehnat tartibi qoidalari) 83-bandiga asosan

BUYURAMAN:

1.Toshkent davlat yuridik universiteti Odob-axloq kodeksi 17-moddasi 1-qismining birinchi, beshinchi va oltinchi xatboshisi talablarini takroran buzganligi uchun Xalqaro huquq va qiyosiy huquqshunoslik fakulteti 1-kurs talabasi Tursunboyev Elmurod Erkin o'g'liga hayfsan e'lon qilinsin.

2.Fakultet dekanlari (D.Umarxanova, D.Kamalova, B.Musayev,

Sh.Saydullayev, A.Babadjanov) mazkur buyruq mazmun-mohiyatini talabalar e'tiboriga yetkazilishi va keng muhokama qilinishini ta'minlasin.

3.Xalqaro huquq va qiyosiy huquqshunoslik fakulteti dekani (D.Umarxanova):

mazkur talabaning shaxsiy hujjatlar yig'majildiga buyruq nusxasi tikilishini ta'minlasin;

mazkur holat takror sodir etilsa, talabani talabalar safidan chetlashtirish mumkinligi to'g'risida ogohlantirsin.

4.Mazkur buyruq bajarilishini nazorat qilish prorektor A.Xashimhonov zimmasiga yuklansin.

Rektor v.v.b.



I.RUSTAMBEKOV

Toshkent shahar

Kiritildi:

Dekan o‘rinbosari

B.NORMATOV



Kelishildi:

Direktor

SH.PO‘LOTOV



Yoshlar masalalari va ma‘naviy-
ma‘rifiy ishlar bo‘yicha birinchi
prorektor

A.XASHIMHONOV



Katta yuriskonsult

A.TURSUNOV

